

卷

施

閣

集

卷施閣詩卷第九

陽湖洪亮吉著

西苑祝釐集

庚戌辛亥

萬壽樂歌三十六章

并序

臣謹按唐臣元結有補樂歌十章白居易有新樂府五十篇類皆言簡意深可以播于樂章歌曲臣嘗慕之伏見我

皇上御極五十五年仁如天宏如地舉凡廣聖極神謨文定武類非形容所克盡致今者恭值

八旬萬壽慶節臣幸得擢魏科備員詞館自正月一日恭讀

恩詔以後親見

皇上敬

天法

祖勤民察吏諸大政足以度越百王而垂則萬世者
已不下數十事輒不自量謹依類撰次爲萬壽樂歌
三十六章非敢繼元白之逸塵亦庶乎衢謠壤詠得
附本朝樂章之末云爾

元日詔第一

上章之年月初建旭日初升太和殿

詔宣宗伯上玉墀二十二條宣讀徧九門以外齊歡呼
一日數驛馳郵夫

殊恩豈獨神州內

普錫還教外藩逮遐哉上古迄漢唐三千年來無此祥
皇皇

天語真堪述每遇庚年輒逢吉

讀實錄第二

作者聖述者聖天命元年逮雍正我

朝開國值泰交百八十載如一朝夜向晨讀實錄玉檢
金函日三復人言

帝治超軒鴻崙師

三祖及

二宗

巴勒部第三

巴勒一部遠在西徼酪食漿飲同時獻表云敬

大皇帝如敬佛三寶珠瑟瑟衣班班道畢拉兼烏闌哈
哩薩野先稽顙巴拉八都還合掌

坎扒窪經第四

樹頭椽高五六丈其實纍纍花可釀葉名貝葉取寫書
一葉百字如聯珠梵經不到西南部以意作經遂四布
國基旣兆立普哇傳經亦名坎扒窪坎扒窪經有義不
歸佛法不歸僧只願歸依

大皇帝

貢子象第五 南掌所貢

貢子象貢子象人面刺花人性獷遠邦百載名老搗左
佩右佩皆雕爪別乘數象來中華不嘉遠物嘉誠效
特敕象房增俸料

春燈詞第六

昆明湖水連天碧萬盞燈輝一天月臨湖亭上看春燈
魚龍曼衍從東升春燈詞接春帖子遠自乾隆丙寅始
辛壬以後皆八篇却與卦象同綿延生生不已真堪卜
今歲自隨還至復年年歲歲游豫同誰識義蘊陰陽通
宸篇下計歸政日却合伏羲全部易

普免租第七

免錢糧免漕糧四次兩次看膳黃今年詔下

恩尤厚普免正供由

萬壽三分減一十減三前史盛事何庸談大農錢粟雖
頻散耕九餘三積儲慣戶部銀仍八千萬

殿勤政第八

夜未央乾清宮中燭煌煌日將出勤政殿前傳警蹕機
庭綸閣三兩賢日或一再瞻

天顏萬幾當晝皆周徧七品宰官多引

見法官御苑名總同行在亦復懸堂中

江甯府官讀書有勤政堂讀書

若以今方古隻日視朝何足數

續石鼓第九

太學中周石鼓二千年來石文古若將一字比一篇却

合關睢及殷武

石鼓舊存僅三百十字

親加排比較短長重刻十

石陳堂皇舊者藏疲珍珠琅流傳至久還堪數周宣中

興製石鼓乾隆

萬壽年春補

八徵耄第十

古稀天子古已稀復越十載符貞期重華宮中製聯句

既壽永昌猶泛語嘉名肇錫得未曾爾章特與鐫

八徵石經若舉殷宗例享國百年重製璽

五福堂第十一

萬年天子今萬年觴五代元孫今五福堂儒臣歷檢明

宋唐得者六輩錢吳張士夫獲此慶已長帝錄從未應

斯祥膺斯祥由慶洽十一世還徵

玉牒

釐四部第十二

四部書帙萬萬提要一百卷臣附臣熊奉

敕撰全書告竣已十年有

敕亥魯須重編

本朝實事皆求是不遺傳疑留一字文淵畢釐文源百
臣日夕來

御園東南三分皆無誤海上然藜校文溯

御製集第十三

御製詩御製文近自己酉溯丙辰文一千詩五萬五十

五年成百卷九經廿史義蘊宣四岳五瀆搜根源遠紹
二典三謨傳巍巍卷軸如山立豈特帝王難冀及十倍
漢唐文士集

五國朝第十四

東西南北車書極朝正國王三十一三十一國分年來
春秋冬夏邸第開普天同慶當斯日五國遙遙適相值
神雞五色魚八捐貢及犀兕兼拾獠史臣若舉春秋筆
五國來朝王正月

開經筵第十五

讀洪範讀召誥五三六經開祕奧萬幾之暇日一編春
仲敬復開經筵經筵樂奏何雍雍抑詩還取衛武公昔

賢

今聖皆先覺九十耄期還好學

親釋奠第十六

臨雍歌幸學詩八十天子猶尊師崇賢坊大成殿二月
上丁來釋奠春渠如鑑波溶溶前年

天子臨辟雍太平盛事皆稽古鄉飲酒歌詩樂譜

朝日壇第十七

朱旗絳扇來城東

至尊親詣朝日宮黃軒紫幄光如燭

至尊親詣齋宮宿太平五色雲擁輪迎日正見雙黃人
雙黃人捧日起朝日禮成天下喜

登岱宗第十八

會稽南恒岳北西及五臺中太室天旋向左

帝邁東卅年六徧巡岱宗吾

皇卓識超秦漢但禮天中不封禪天門日觀瑞色開八
旬

天子騎驪來

謁闕里第十九

倚昭維則聖人在昔衆善若林六經乃宅猗皇是欽

聖人在今

宗謨旣纂

祖訓是尋青旗央央越歲來謁前聖後聖其揆則一歲

則庚戌月維庚辰山左三大禮祀畢臻

百歲民第二十

廣督摺直督摺百歲耆民比肩立滇撫章皖撫章民間
五世共一堂

太和翔洽超前代不產麟皇產人瑞朱提文綺出上方
幾餘染翰錫一章耆年壽婦布魯特絕域貢珍由感德
萬壽科第二十一

萬壽節萬壽科九十八十來婆娑春官一百二進士外
一百人年已至

詔出東華盡宣賜膠庠抑阨五十年閭苑盡許稱神仙
白髮亦戴花盈顛升平盛事誰能及雨宴南宮值庚戌

大學士臣璜謝摺

勤察吏第二十二

盜不讞責總督清苑縣官愆莫贖吏蠹民責撫臣高郵
州牧罪較真

皇躬一日周萬幾外省案牘何從稽

詔書直下諸大吏當戒江南與直隸

清字藏經第二十三

西華門中闢經館大小乘經堆欲滿法門先寫百二章
排比兩晉兼三唐

國書結體尤嚴重舉筆如龍復如鳳經成一藏功萬千
佛力祚

皇萬萬年

黑龍潭第二十四

三月麥四月秧不雨麥瘁秧將黃

行宮宵旰無時釋先詣黑龍潭外歇排空萬朶雲垂垂
真龍不禱雨不來

三大祀第二十五

三大祀歲必親五十一年象輦陳南天壇北大內百尺
燈竿與相對壇內宮中合虔拜耆民夾道成風謠五十
五徧

躬南郊

山莊夏第二十六

灤河之北臨邊墻每年避暑來山莊雲山四面奎文署
云是山莊最高處澄然四海集一心日日亭上占晴陰
殿前引見員管滿吏部帶來分月選更撥幾餘念柔遠
山莊但識無炎歆日具可念
宸衷勞

經壇設第二十七

九門中官吏車一日百輩來徐徐殊方絕域摩肩入在
籍諸臣亦羣集分曹百輩爲一班盡檢大寺開經壇湖
山郁作梅檀味初日輝輝照初地青梯樓閣須暫開
無量壽佛拈香來

盛典增第二十八

萬壽盛典凡六門

聖德

聖文兼

聖恩萬方集慶儀文重其次繪圖同獻頌巍巍蕩蕩難
具書特徵二事古所無八徵五代奇祥起塞外闢疆三
萬里

夕月壇第二十九

朝禮日來東郊暮禮月來西郊

鸞輿親向齋宮出

萬壽節過才一日規壇不獨祀夜明二十八宿兼經星
不見唐貞觀樂五闕隋開皇坎三尺豈如吾

皇大祀躬致虔禮成光景生中天千秋金鑑懸當前

安南來第三十

安南來安南來國統雖舊基新開廣南大吏爲陳奏親詣

天朝祝

天壽路人指點盡識名安南國王阮光平海邦自此知

冠履好變文身與椎髻

阮光平奏請從本朝章服特旨俞允

前殿宴第三十一

太和門中頻列讌日日平明御前殿七旬宴後復八旬

下逮屬國兼陪臣年九十階一品特

賜金尊殿前飲千人統計歲萬千稽首合作今

皇年就中受

恩誰最樂國子監

臣郭鍾岳

祝嘏樂第三十二

祝嘏樂樂一部歌者歌舞者舞敲銀瓶擊銅鼓萬里遙
遙來祝嘏太常樂奏列四蕃不數貞觀兼開元蕃王親
向階前祝更獻十章名法曲法曲十可歌亦可謠一章
一章名特標謁金門賀

聖朝

阮光平進
寄詞凡十章

萬

昇平寶筏第三十三

三層樓百盤砌上千青雲下無際上有立部伎坐部伎
其下回皇陳百戲蟠天際地不足名特

賜大樂名昇平考聲動復闢民事不特壽人兼濟世
方一日登春臺快看寶筏從天來

王會圖第三十四

東西廿里如繩直夾道樓臺成頃刻千層覆屋百尺臺
大舸載自東南來回廊曲檻天然合空處扉櫺自開闔
方壺圓嶠咫尺間海上頓訝移三山拈毫若準唐貞觀
王會圖應添百卷

普天慶第三十五

日庚申圓明園中

法駕陳日甲子乾清宮中鹵簿起宮中御苑石作塗萬
叟夾道還嵩呼如山燈火連湖曲想見太平調玉燭

萬萬壽第三十六

萬壽節日以十三時八月月琯日微皆叶律我

皇御極當丙辰越若稽古堯期臻五五數復箕書陳無
疆若展大衍策萬有一千還五百

馮少卿應榴夢蘇草堂卷子

時馮作蘇詩合注

少卿室冷無纖塵頰濱翩然來叩門履聲皇皇響空谷
欲前不前猶躑躅褰簾一笑霜滿空迎門次公立長公
長身高冠貌奇古七百年來覲詩祖邀公不入亦可思
一屋光燄皆公詩夢中自謂得所師敬告欲續施元之
公雖不言心已可來處仙雲落如朶裁眉山月清可憐
半夕移挂高齋前來時不迎去何送我謂非真亦非夢

醒來急詣南頭翁謂翁綱證以盡象將毋同君不見少
卿詩名滿人海夢裏師公醒如在因君我亦念辦香太
白樓前一江水

自蒙陰縣界早發從車上望泰山半日始抵山麓又步
行半日憇高老橋日已曛黑乃尋路而返

夙昔好大言岱宗視秋毫茲來距百里意念肅不驕靈
風吹車帷總向西北飄日上戴一山半白雪未消平明
開東峯忽與天爭高向背卅里間鉅細無不包聖人坐
明堂若受萬國朝半日走未休才能憇巖腰絕頂豁一
門注視久亦勞誰云千丈松貼若徑寸苗海氣潰石崖
天聲走林梢來乘西月光去揭北斗杓小酌白石泉吾

行過飛橋

臚傳日馬上口古寄畢尙書師湖北

五年爲客曲江頭屢向慈恩寺裏遊
曾解綠衫陪廣讌
愛拈紅杏上高樓
看花未必輸前度
擢第偏教遜一籌
好繳公門舊衣鉢
至今慙愧說袁州

昨年里中有入都者偶占五篇寄友海內交舊見之共
詫以爲洪體今適一年余留官京師里中知好復往
來不能去懷適汪甥楷以定省南歸爰更賦五篇寄
諸同人末章并以示弟原吉及兒子節孫見者幸勿
復以爲創體也

盧學士文昭

里中誰最憶我憶抱經堂抱經翁七十讀易猶琅琅餘
經貯案頭日漬丹與黃盤盤經師居庭草一尺長問字
數百人誰來上堂皇匪徒文體乖書仍誤偏旁俗學錮
性靈反厭師說詳一月偶一來惟應伺餽糧就中領悟
誰庶有顧明與臧鏞堂顧生嗜說文臧生勤爾雅百里
澄江中誰如二人者

錢大令維喬

里中誰最憶我憶竹初居前年養疴歸買地十畝餘四
邊何周遭桃梅竹棕欄規高欲巢禽掘地乃種魚魚鳥
旣獲安餘力營吾廬一室開八牕風日來徐徐主人欲
登樓花氣爲縈紆主人欲出門芳草攔衣裾北巷呂秀

才景尚南頭畢居士涵偶有剝啄聲經旬一來此

趙舍人襄玉

里中誰最憶我意味辛齋味辛齋中居風日多好懷五日一出遊經旬宴朋儕我居與若居僅隔南北街花時與月時出入必與偕君尤善清談觸緒理不乖差苦持論莊時爲雜詠諧同志六七人均能外形骸無日無客來闔敝不必排不來亦有時或值體不佳盛情大異堂近南歸莊寶書蔣齊耀復遠宦預苦離別多臨觴定三歎

蔣上舍馨

里中誰最憶我憶杏花樓杏花旣已枯種杏人在不雖

無一株花花下石尙留雖無種花人畫象懸樓頭昔爲
大母居謂外祖母今屬孫曾遊孫曾非問訊敬我齒已
優童年看花詩黏壁尙四周種杏曾幾時一讀一淚流
檢點樓下人半又客遠州阿三庶雁行阿二廷耀尙兄
事何時續栽花吾當日三至

弟原吉兒子飴孫

里中誰最憶我憶卷施谷拔心不死人時來谷中宿谷
中有羣書谷中有嘉木主人出門去書好無人讀花紅
上斗拱草綠出垣腹賴有主人兒時來理書簾稍移碍
簾燕時剪出牆竹昨宵家問至北上期亦卜愁無束裝
具典却里中屋一書寄令弟一書示飴孫此谷不入券

爲吾鎖重門

自題城東訪月圖

余家清暉橋距城東門不三十步出城古寺五六排
比而立寺後爲晉陵縣故址廣場數百畝幽人三兩
家余每晚食後必一詣其處半里之內鳥之有巢花
之有名者莫不與余相識卽風雨夕不能至夢亦詣
焉庚戌獻歲將北行友人錢明府竹初畢上舍蕉鹿
爲合作城東訪月圖遂係以詩云爾

月初三至初九一日一回城外走十三以後人不閒人
靜月好更先闌徹夜不遣城門關月過二十看星出乘
殘月歸更欲絕人言我愛月如癡不識城東月尤潔城

東有白塢城東有紅橋橋痕下欲枕蘋藻塢影上直干
雲霄迎春堂北東西路一草一花都識數匝月能來二
十回繞堤何止三千步三松一客靜淹留復有危巢結
四周好寄吟魂與烏鵲夜深隨月上城頭
張進士若采梅屋讀書圖

築室高丈餘鑿楹深尺一我愛一屋中書外無長物無
心種桃李無心種桑麻我愛一屋旁梅外無餘花書牕
只向梅邊拓果熟好從書上落長身如玉忽然來不是
主人疑是崔

送莊通判所至漢陰新任

太乙從西來終南向東轉我前甚羨君十字山水縣

君

宰鄆鄆宜君蓋屋富平長安咸甯渭南朝邑諸縣今擢判漢陰高觀潭上鑄牛頭寺中

詩君前亦羨我五醉桃李時花枝歷亂山南路紅欲上

天雲轉妬君從山縣偶然來一路尋花入韋杜黃河西

岸渭水隈我頃亦復騎驢來君官鄆及蓋屋朝邑時余皆會至其署中君家

令子亦好友十日留飲三千杯仙遊壇北風飄瓦君坐

藍輿我騎馬意外孫郎手重把慈恩塔下日炙軒君摹

石刻我上巔拍手尙有斐江錢謂獻之尙書寶從居然

昇醉裏後先升上第萬條紅燭百篇詩贏得人傳杜書

記識君已州載別君又五年重陽風日正晴好相與共

話金臺邊泊中別駕今何有五十才名作通守鄆杜山

田買不成全家更進褒斜口離筵重傍菊花開適有尙

書信使回畢竟梁園賓客好如今視草用鄒枚

吳布衣蓬癡寄示紙仿秦漢瓦當爲題二絕

陶泥作瓦形難古

近西安陶者能燒漢瓦當與真者無二

爛紙爲泥法轉

良總是劫灰燒不盡有人閒裏仿阿房

應共錢獻之程彝齋作雅遊青門西去曲江頭蠻牋十

樣如分寄君定能成五鳳樓

送李同年廢芸赴任浙江

上章閣茂歲科舉由

萬壽我方登岱宗三月乃北首遊山筆殊健得逐衆賢
後同舉一百人于君契尤厚君才富詞藻早復窮篆籀
闡中萬言策兩策蒙進奏春官遲錫讞新例試當覆

光明殿東西

賢良門左右

聖人親試士如漢策孝秀衆中君最捷一卷成正畫引見來

御園麻衣改紳綬人才較清拔竟以民社授官由楚改

越以邈老母老欲遷就十月始出都風號雪花驟同袍

凡八輩執酒道旁候疲馬出北門依然學寒瘦阿翁循

吏傳君母酖亦以噍士車上可尋究努力報最先無徒

事琛賔翰軒倘重到舊侶可全觀郎官改祕閣此例亦

有舊二十有七人今歲蒙恩入館待子成列宿

王大令復自汴中來邀同人小集惜陰秉燭山房羅布

衣聘作圖紀事是日并送儲明經潤書南歸分韵得

租字

有客歸何急疑收陽羨租似君來正好還挈朗陵厨官
滿趨金闕春濃買玉壺朝衣吾幸典衫笠入斯圖
十五夜對月獨坐有懷里中舊遊

獨酌一樽酒含情上小樓故人難會面明月却當頭隻
影長廊入清輝滿鏡收誰云天上好今夜不勝愁

送萬大令應馨之官廣東

謫仙樓頭乍相揖君年三十我二十

初識君在朱旂君先生節署下旂云

高幘張黃皆署中客也

平山堂外飄長裾君年四十我有鬚廿年

歲月真如駛高

東井顧文子張方海

黃此中死卽今海

內論心交汪子劍潭憔悴孫郎淵如豪馬蹄亂踏長安
市前後與君成進士若論位置殊可商君爲外吏我漫
郎一官遙遙六千里三月仍難具行李僮饑馬瘦住不
安我轉質衣謀爾餐孫郎汪子交終厚日揭破車門外
走窮冬行色畧已成此時送君須出城崇文門前別不
足更借宣南坊裏宿故人有子稱能文贈仲昨歲主我
今依君君不見貧交生死原非偶此子年來況無母君
先令讀等身書我爲故人兒娶婦

錢同年福昨乞假南回書此送別

君歸我何憶我憶西湖水飲水亦已香水中夢更美湖
中誰最憶我憶裏湖魚小繫雙篷艇時來五柳居湖頭

誰最憶我憶山陰酒一葉載百鎊千錢沽十斗湖邊誰
最憶我憶上山茶煎向深甌內如開數朶花預想君歸
時食單先出宅烹魚水要鮮醒酒茶先摘此時却憶金
臺人無米飽飯天街塵人生快意當有日君倘能來我
應出

崔公子景偁竹樓圖

竹綠參天筍亦抽偶然竹裏有高樓不知樓上人何處
我欲打窗尋不休

三尺寒檠七尺牀阿三曾共捉迷藏謂令兄落來盡裏
還相識爲我窗西補夕陽

袁安卧雪圖爲王太守嵩高作

屋頭無炊烟門外一丈雪此時屋中人已恐不能活永
平及永元三世弼天子此時屋中人如何遽能死閉門
一卧歷一時門外雪深殊不知洛陽縣令來何巧從事
汝南饑欲倒門外雪花飛入竈從茲舉足一出門衣被
四海皆陽春眼前高卧匪無意預想俗敝當還醺君不
見丈夫一世歸裏抱有事日多無事少卽論無事亦須
眠那得閒心訪安道

三月廿五日小病初愈至法源寺看花適得崔三景侃
書却寄

剩得韶光有幾時病餘端不負花枝商量欲把春衫典
又值微寒颺雨絲

幾日人閒蝶却忙
引人花底款遊廊
傷春正憶昨年事
迎面一枝紅海棠

冥蒙花外語呢喃
燕子真同佛一龕
千尺綠陰吹不斷
粉紅牆北是江南

鶯鶯燕燕可憐春
乍款花枝乍款人
無數亂紅飛上柳
更疑楊柳是花身

一春心事費商量
欲趁春陰夢幾場
花上曉星花底露
分明著眼看年光

春盡傷心抵歲除
江南別後意何如
丁香花底懣懣醉
却展崔三二月書

五月初三日偶成

蜀葵如錦繁籬根檐雨初添屋漏痕新月乍來簾正捲
槐花落盡不開門

五日憶白雲溪競渡作示兒輩兼寄錢三趙大里中

黍稷菰蒲酒泛芸薄醺閒話小兒羣江鄉四月饒新雨
樓閣三時盡白雲溪果作紅偏礙帽岸波搖綠欲煎裙
誰憐天上清如水手擘桃符遠憶君

送丁二履端南歸

白雲溪水向東流我住南頭爾北頭小市酒帘頻夜飲
斷橋蠟屐共春遊
竭來天上愁無盡却惹人前罵不休
屈作宰官原可惜時提借崔曼亭太守至荆州也應差
勝客荊州

法學士式善招飲詩龕并至西直門看荷花卽席賦贈

一首

翰林近日詩名盛遠有詩龕近詩境

翁開學方綱額詩其齋曰詩境

龕主人尤嗜詩退直閉戶吟多時

龍樓鳳閣森前後尺五天邊住偏久五陁山色落牆頭

時有閒雲墮高柳開門十頃荷花潭邀我早日同幽探

啟明星落已催駕我本蓄意來詩龕馬前遥遥兩紅燭

十里路中晨睡足詩龕已到不索詩舊讀主人詩已熟

東頭詞宗百菊溪

御齋

宗伯宅復連街西

驥侍

三人分

日操選政

時有滿洲四朝詩選

一室墨雨揮淋漓以詩存史誰能

及佚事多年苦按輯遺山已矣傳習亡北斗以南惟此

集清談已竟還傳餐飽食散步來河干城門正對御河
口萬柄荷葉風聲搏官衢南北車如織騎馬欲歸歸未
得青槐影裏晝初長我亦玉堂將入直

七月初四日遊極樂寺看荷花分韻得看字

出西直門三里而近有極樂寺焉長河蔭前高阜倚
後其東有國花堂西有勺亭皆城外之幽構也梧門
學士以偶日下直徧招同人飯于詩龕接軫以往車
行者三里舍車而徒復二里甫抵寺門綠陰當空赤
日亭午池荷東西曾不百步間以傑閣繞之回廊水
氣升岸結爲輕綃林香入波漾此晴采于是或暝坐
巖側或孤行竹中或擘箋庭隅或讀畫塢側堂高干

垣者一尋門低于砌者百級重寮洞開直視十里負
戴而來者望之如鷗乘軒而過者擬之以艇坡塙高
低岡阜回互香氣拉雜雲光降升促纖繞砌聲如碎
琴風蟬過枝韻疑零鐸遊藤綿延上樹皆紫細草芬
郁杼花必黃乃蔽炎牖爰開北窗松露尙零柏風成
陣家京國者離然有雲表之墓宅南中者又恍然有
江鄉之思焉林陰屢移羽觴乍接果則紅暈徑寸與
藏冰而共升瓜則生黃滿盤汲井華而并薦陶令之
榼無時不携韋公之薜適心而飲相與商確今古縱
談雅俗據石命句臨流作圖幽襟旣抒勝賞斯愜又
破曙而遊薄暎始返星河滿空影乍曳乎籠燭雷雨

在後勢忽掣于軒帷此又晴晦出于一時涼燠交于
俄頃者焉同遊者爲許封君兆桂張運判道渥李刑
部鑾宣何工部道生吳明經方南及梧門學士與余
凡七人運判旣爲之圖余因序其顛末云時辛亥年
七月初四日也

長河萬柄紅荷花匝月不來開已半花枝似嫌河水窄
幾葉亭亭欲升岸初陽入浦看難定十里雲光自淩亂
寺門南下景最幽可惜年時水波斷田田葉瘦花枝悴
我欲重煩桔槔灌新秋天意亦可知雷雨急將新水換
別來花不忘前約一朵迎人出橋畔東西燕剪掠不停
惹得盤珠落無算鶯黃鷺白來成陣一一見花如欲喚

花香深處朱樓好，檢點新涼放詩案。明朝無用騎馬笑，
晝取花枝卷中看。

送趙大令希璜之官夏邑卽題其三十二峯詩集後

昨來却輕裘，今復馳急騎。牛腰詩卷行，必偕復恐人呼。
作塵吏趙生三十詩名早，脫手羣公已傾倒。黃生矚仲
租屋與對門，五夜疊誇詩句好。爾來十載官長安，君行
入關我出關。終南太華皆歷所，恨背我遊梁山搜奇
剔勝狂如馬。好古如君亦應寡，摩天欲覓秦昭箭掘地
能尋漢官瓦。山南山北行不休，官好到處容勾留。幾年
頗喜善摘伏，一事可慙同摸北。盤盤法物歸樽俎，奇字
人詩詩愈古。我披三日手不停，可惜良朋已黃土。
贈仲

歷官差喜名區多昔傍陸海今黃河譙城北去黍邱石
不日仁聽疲民歌河流日夜犇馳速此土年來亦非沃
故入一語欲規君好破夜唸披案牘

跋鐵宗伯保容臺詩卷後

梧門學士交何遲乍見示我容臺詩

宗伯屬梧門學士轉示亮吉容

臺詩名高北斗三百二篇如一首誰言官貴詩難工此

卷半出雲霄中

西清南苑日趨侍日月混濛天花紅橫山北上灤陽道
眼底萬峯青不了直廬夜半忽朗唸援地倚天長句好
琅邪參政勸齎嘉禾翁麟祥詩名海內歸秩宗先生健
筆復軒舉要與冀北開宗風萬條紅燭聯官騎正好同

官有難弟玉環驛玉河斜月午門鐘馬上百篇成復易我
前讀公詩今復隨公遊殿頭作賦公最賞可許執筆從
螭頭君不見丈夫事業垂區夏豈僅曹劉與方駕他時
一品集編成我欲作文同鄭亞

法學士式善山寺說詩圖

茅屋十數間青松百餘樹昔爲說法場今作談詩處說
法祇了生死緣不若說詩能使死者不朽生者傳倘同
天釋較功德一瞬萬古殊相懸梧門學士才名勁說法
亦同僧入定席前傾耳凡幾人木佛都疑座旁聽談深
不知寺在山高論往往通天關指揮若假鐵如意花雨
欲落茅檐間詩龕左右詩如海

時選近人詩

丹墨紛披幾年

老於閑館第六
三
載他時悟後忘語言更有不傳詩法在

送周同知世紹回西安

詩名宦蹟廿年中雅與高三十五同

君衍云

二十雙節正

堪膺上佐百篇曾共賦東風同官一輩憐亭長

錢獻之自號閑

音亭長時宦況甚苦

因爾連旬夢石公

君與張舍人石公交最厚

欲別更邀通

夕飲城頭殘月已如弓

贈陳方伯淮

十年兩度謁行旌叩閣皆逢失喜迎殘雪尊尊滋水驛

經秋風月武昌城詩名早見題襟集世澤欣承曳履聲

倘許從容話鄉里鵝籠我本舊書生

偶成

白露甫三日闌干著意涼偶然飛雨至花亦點頭忙

雨中答法學士見懷之作

重門三日雨百鳥響俱寂秋館渺無人青苔夢行客閑
房夜難寐矯首望城北昏霧接半天連林色如墨遙憐
通德里定閉草元宅瓦燈紅一盞砌草荒三尺應有苦
吟人披牕檐漏滴

卷施閣小集

秋樹脫一葉素心來幾人將以屐齒頻補此閒庭春閒
亭立多時一客入門喜胡蝶亦翩翩飛來客懷裏斜陽
倏西頽新月已在東同心六七人團坐秋陰中秋陰何
離離一榼傾未了幸有石上藤先扶醉人倒屋南青梧

桐屋北雙株槐諸君欲言歸正好月滿街

十三日張運判道渥招同人小集分韵得露字

長安路花無邊酒無數醉中陶陶十年住酒客家家識
門戶西風幾徧吹酒人去何處今朝花下飲忽復思前
度主人愛客黃金富何不先將酒人鑄長安路人生行
樂須及時君不見屋角殘星草頭露

中秋日無月獨飲

中秋月一年無一年有有月卽出門無時滯盃酒離離
雞冠花短短鴨脚草秋紅旣傷心秋綠如何好秋雲吹
黑入酒尊長安比來無酒朋坊南深冷一間屋判與無
月還無人闌干影外初停雨舞罷筵前小兒女我有心

情梁燕知三更尙作將離語

十六夜有月

幽人喜新晴屋角看星影巡廊才數武圓月出西嶺白
雲東西飛不停七里壇樹秋烟平危樓驚起白蝙蝠似
曳疋練空中行天橋南北千家宅萬瓦參差月光濕柳
絲如沐草垂珠添得碧苔無限色微風吹空月流波山
翠落向城隅多清輝入掌覺微膩衣上似復傾銀河歸
來敝南軒傾此一榼酒三更靜後無一人却喜戴頭惟
北斗北斗未落客不眠一榼酒盡愁無錢光明如此不
須燭却把道書梯上讀

曾孫用勲校刊

卷施閣詩卷第十

陽湖洪亮吉著

祕閣研經集 辛亥

南樓憶舊詩四十首并序

夫鳥以高爲巢魚以深爲穴居魚鳥之中者人也築
基九層而上爲之樓則與鳥爭高矣濬池十仞而中
爲之島則與魚競深矣然鳥啁啾而爲巢使無矰繳
之患則終歲猶是也魚屏營而爲穴使非芳餌之誤
則畢世無易也人則不然飛狐落雁之嶺八埏之險
也鳥所不能飛者人或上之矣奔霆浴日之區九州
之浸也魚所不能厯者人或過之矣則夫陟險不已

將迷東西揚帆倏來杳無津涘當此者其亦有故巢
之戀在沼之思乎南樓者外王母龔太孺人所居也
余以孤童幼蒙鍾愛年未毀齒從母移居姊越十齡
弟才匝歲魯國男子方驚毀巢漢陽孤生未歌窮鳥
由春徂冬衣無單複之製以夜繼日瓶無逮晨之糧
熒熒焉踽踽焉蓋十五年于此焉若夫雨龍竹馬瓦
狗泥車探春燕于棟頭捉秋蟲于徑裏罔睹跳而將
平井投輒而欲滿臨溪咒鴨涉渚撈蝦旣兒戲之無
方亦童蒙之求我此一時也隨母梳頭之歲從師識
字之辰烏焉混于一篇蚯蚓登于半紙藏書之篋時
匿意錢衣帶之旁私携面具同學則謝家阿買送餐

一則裴氏小奚盼日影之不西怨鷄聲之太早此一時也至乃歲值元枵門憐奇窘仲理則厨難耗鼠史雲則釜欲生魚井淘麥屑反避知親徑拾墮薪偏逢長者然而天青入牖水綠周堂秋月寒門春花交砌何嘗不破啼而四顧擁絮以周遊此一時也又或蘇季上書全家盡返桓姬索米半舫爰來謂賈齋舅氏及適楊氏從母中外則雙丁二到不乏奇童弟兄則甥未封胡并饒道蘊虛堂論史鵲亦垂頭側徑獻詩蟲來嚙踵篙師南巷雅乞書符蠶妾北頭偏多問字此亦一時也授徒北館作贅東堂卜商色養之時賈誼秀才之曰會稽僚壻動色而見嚴生陽元尊章改顏而親劇子鄰

有束綯之饋室無蔓金之聲闢竹徑而待賓借柏堂
而讌客此又一時也詩曰維桑與梓必恭敬止又況
螟蛉果羸之場與松柏蔦蘿之所乎此則明明如月
難忘在闔之辰悠悠我思無踰樹杞之里遺聞傳于
斯養瑣事得于鄰童畦栽赤莧則湔上之蒼頭穴識
金鑽則羊家之故媪失簪楚國墮履徐方燕知春社
之人犬識衰門之客延陵之劍無封樹之堪懸班惠
之書有篇題之可認能無墮傷心之淚鐫恩舊之銘
乎又況臘頭社尾上巳元宵餅值春辰饒名令節楊
柳半橋之月芙蓉北市之燈水增一尺則已嚙閤門
樹密三重則隱開樓扇燭龍之首與鵲尾競高彩鷁

之竿與神燈並出販脂鬻粥擊鉢吹簫莫不紛至沓
來風馳雨驟此又晏嬰之宅因近市而居奇虞氏之
樓以臨街而角勝標孝侯之風土記荆楚之歲時差
可連類而書削牋以奏者哉詩四十篇稿成以寄巡
檢二兄上舍三兄文學四弟凡爲此者亦所云寄魚
鳥之思今昔之感也

沿溪樓閣枕南頭溪水迢迢自北流怪底近來鄉夢好
一句多半杏花樓

載來塵具不盈車孤另偏應託外家絕似幾番霜信後
一枝籬落寄生花

余家自追貽先曾祖大同城工核減
帑項田產悉入官至先君子下世遂

無乙像
可居

循廊三折入層梯板屋居然判畛畦不向大家厨索米

自泥新竈小樓西外王母以南樓西偏一間令太安人率余兄弟及三姊居之

七齡入學感孤兒逃塾先教都講咄燈下國風還課讀

始知阿母勝嚴師余七齡附學實君舅氏書塾蒙師為憐牧菴先生外兄肇新則學長也

婉轉隨娘識百憂貧家照水亦梳頭不知梁燕緣何事

却怪春人懶下樓此言諸姊隨太安人作苦終貴不下樓也

三月青黃不接時燕南書札寄歸遲朝來欲糴桃花米

已報租船到水涓外祖母田不滿百食指浩繁每及缺乏時素園舅氏館于京師亦間寄修脯歸供

匱乏

黃泥墻北颺街塵簫鼓嘈嘈聽未真清曉上書還未半

巷頭不放看迎春

夜寒窗隙雨淒淒長短燈檠欲迷分半紡絲分半讀

與娘同聽五更鷄餘八九歲時自塾中遣歸每夜執太安人紡側讀恒至漏盡

一年多半住江邨饋歲匆匆入里門不待郡城元日到

江船先已送河豚此謂素園舅氏妻楊孀人江陰楊文定名時猶女也一歲歸甯時多惟蛸

臘乃回

十齡左右謝家甥孤露偏憐易長成綰得一般雙角髻

家家戶戶拜新正

侍郎宗泚號東莊愛女先教住近坊便了作奴如願婢

有人分日饋羹湯此謂道莊氏從母事外母最孝常分日饋羹

西頭阿姊慣勾留小極扶梯不上樓約得走橋諸女伴

背人月午更梳頭

天中節後賽神多十六雲車次第過剛是卷簾迎面看

水嬉又報進城河

吾鄉雲車相傳隋司徒陳杲仁守城時所創今司徒誕日及賽神皆設之

城內外凡十六坊故數亦十六

迎門西去徑欹斜曲曲房廊被柳遮一尺井闌涼沁骨

記曾團坐說人家

外家門西偏有井嚴清冽近間已涸矣

清明過了又端陽母不梳頭針綫忙幾日斷餐緣底事

疊錢來買束修羊

吾鄉從師者饋束修常以清明端午九日及歲除爲四節

衆裏聰明百不如學將新樣寫神荼比鄰一半迎春帖

乞取蕭郎弱腕書

歲除前數日臨溪三五小家每將紅牋乞書春帖子

久別都應見面生相逢幾徧問年庚早來阿母房前過

親切重聞喚小名

此指適河橋程氏姊妹爲婿易氏次女與余同庚從宦京師十年歸而

問函長
初故云

江鄉豐歲景偏饒親製連環小樣糕一棹牢九三百順

歲除筵上吃元宵

此指適揚氏從母居咸東鄉芳茂山歲除嘗饋外王母餽及粉九外王

母以分給諸孫及余等粉九俗名元宵

走索人教細馬馱十番纔了又秧歌臨街樓上情騰坐

要看魚龍徹夜過

樓前為縣學每春百戲集每

間訊厨娘去不回歸甯百徧使人催五更枕上春波響

知是山橋艇子來

縱甯外王母發居後隔一二歲始一

樓前楊柳最依依樓下人家試袂衣那識清明好時節

滿樓胡蝶雜花飛

雲溪清明前後風景尤勝

尋常不放到門邊生小都憐疾病牽記得廿三逢縣考

小心囑上渡頭船此指十五歲時初寄湖應童子試也

連壓北出竈新添疊日齋厨課米鹽買得呂家新宅子

小房分住白雲尖暗齋舅氏出後從外祖文元遂徙居白雲尖

新裁錦襖東窗胸競渡先將逆浪衝日午晏公祠外路

暖波初試小青龍吾鄉競渡最盛以余所見不下十餘有金龍小金龍青龍小青龍白龍及

五色龍諸目

別開池館隔重牆半種芙蓉半海棠留得一方明月在

倩人涼夜捉迷藏此指從舅氏故宸先生所居在南樓西偏饒有花木余幼時常與中表寅

嬉戲于此

社公生日是來朝已聽沿門畫鼓敲今歲燭龍添九節

簇燈還插滿池菱旣不齊及其社日並有龍燈自三節至九節者俗名滿池菱

八字門偏路復以春陰曾不隔窗紗冥濛添得牆頭黑

知是東鄰皂莢花

此指從舅氏秀君先生所居在南樓東側有皂莢一株發屋常滿

塵土真疑欲污人尋常衆裏亦嫌身蓬門一例先教鎖

明日高齋會六親

自移居後外家有太燕集太安人常鑰余兄弟于室中不令出

一條幽徑幾家通徑轉偏憐曲似弓攜得紙燈何處去

石榴廳北捉秋蟲

從外家東廳側有長巷一條門凡三四

並宅焉石榴廳即從舅氏居也

銀泥榻子粉紅牆峽蝶遊蜂爾許忙一陣暖風初過處

百花齊撲曬衣場

為諸樓後有隙地一屋曬衣之所

纔過中元又下元賽神簫鼓巷頭喧年來臺閣多新樣

都插宮花扮杏園

賽神會中每用七八人扛一牌上扮金元院本諸故事名曰臺閣

手簡先蒙羣從招郭東明日合登高晚來乳媼床頭說
好吃倪家九日饒南樓外水有倪姓即乳母王氏女夫
也

新來小婢勝樵青識字依稀認一丁乞與百番書紙仿

韋郎十五擅書名

姚指素以羽氏自江西罷任回有浙

一室如瓢枕水隈綠楊影裏小門開紙鷺脫手人驚散

却值先生曳杖來

外家書號名

昨宵短至飲梅漿功課新添日影長還喜學堂人散早

初三新月上紅牆

樓遠東即

榻子通明刷絳紗小庭三面放秋花已涼天氣清如許

約伴今宵守月華

庚辰辛巳歲後值中秋日每與外兄

南樓守月華
恒至微曉

除夕初開燕喜筵諸孫合隊拜床前有心欲乞奇書讀

辭却朝來押歲錢

歲除日選青錢結百索賜兒名押歲錢亦名百索

園扉斜對禮門開纔著襪衫馬已催惹得比鄰皆注目

秀才初謁泮宮來

此余初補博士弟子宮禮門正對舅氏園門與學宮

露滴新紅水染藍兩重門裏試單衫齊花撩亂春如海

記得年時三月三

吾鄉諺云三月初三齊菜花兒單衫

只把聰明譽慙孫說將孤露便聲吞紗帷寂莫庭花死

垂淚頻過通德門

外祖母以乾隆丁亥十月晦日下世不數年樓前杏花亦萎

題張同年問陶詩卷

同輩二三子詩各有所優或優春夏氣亦或優于秋惟

君一卷詩盡把秋氣收讀詩亦不同候有昏與夙或當
映疎星或欲秉明燭惟君一卷詩宜剪秋燈讀昨携君
詩歸氣候已迫冬翛然一室居四面皆秋蟲又疑秋鳥
鳴嚶嚶滿寒空此聲非出砌此聲非出籠有聲亦無聲
均出詩卷中秋燈乍滅還乍明時復朗誦時孤行思君
此意不可得無乃造物賦爾偏多情燕臺住十旬蜀道
遠千里思親兼念友悵悵何能已我欲借春氣生君十
指間方君作詩時桃李皆開顏迨余讀詩日花色猶斑
斕然後登君堂飲君酒我狂可百樽君捷亦千首謫仙
和仲仁公諧蜀並庶幾若說今人已無偶

附原贈作

張問陶

翰林胥未遇名高神采王歌聲塞寰瀛筆與嶽瀆抗
今春同拜官識面巖坡上示我紀遊詩雙眸豁層障
墨雲騰十指一往但奔放崧華想嶽寄江湖寫清曠
眼前真實語入手見奇剗五字作長城騷壇踴名將
我生齊楚間望古心無讓衣染泰山雲帆迴洞庭浪
年來苦饑走轉喜遊蹤暢足跡半人寰舟車隨所向
夢中窺海日愁外看雲嶂方域所區分鶯花亦殊狀
方知詩律難一得終無當小技具神工乾坤歸醞釀
軒然讀大作一片官音亮萬象羅心胷此才胡可量
詩人遇不窮名士語何妄努力頌昇平殷勤副時望
長至前一夕久坐待張同年不至兼懷里中舊遊拉雜

書畢不覺破曉

三更正懷人一馬嘶過巷失喜自啟門正與馬鞭撞馬
鞭東指客面生孟浪客前還致聲入門無聊出門走更
向街西市春酒歸來風葉隨打門打門童驚欲詈人僮
癡貪眠客貪起十二曲闌行不已隨闌一曲酒一盃靜
若主客相追陪青天淡淡雲如掃月光畢竟江南好金
波樓閣紅闌橋去年此月還此宵相思不獨人如鶴兼
有野梅初破萼梅枝開落未一年轉眼客路成三千人
燒銀燭朝天早我典金貂猶醉倒坊南遠客期不來不
覺一窗先白曉君不見我居咫尺郊壇中壇外雲氣升
如龍更殘烏鵲不敢東

天子今夜居齋宮

附

張問陶

臘月十三日與朱習之石竹堂錢貞夫飲酒半夜忽有作道士裝者影門掩入視之則洪稚存也相與痛飲達旦明日作詩一首分致四君同博一笑

勝侶偶然合何妨一舉杯南隣朱老聲如雷大呼僮僕無遲回曼卿亦復隱于酒錢郎爭勝惟狂吼閉門歡笑儼一家掃除賸客如揮帚回看好月來窗下更洗清樽同卜夜肴盡將擒寺狗烹壺傾又向鄰僧借客貧歲暮時搔首豈不懷歸愛吾友任他風柝響三更密坐談心還執手何處微風入開簾若有人羊裘

羶履五柳巾莊嚴妙相如天神大叫取酒來四座皆
逡巡疑是唐朝酒人李太白不然定是荷鍤所埋劉
伯倫屋漏之神或大笑公等無鑿混沌之七竅樽有
餘瀝且澆之乾坤浩浩知爲誰吁嗟乎乾坤浩浩知
爲誰醉中各化飛雲飛

十二月初三日雪霽邀同年張問陶顧王霖過飲醉後
作

牆東半畝園雪積難置足客來門亦鎖護此一庭玉高
低枝上白萬條愛惜不遣兒童搖今宵却初三新月出
牆腹峩眉山下人聞來訪庭竹掃此枝上雪筵作盃中
春冷飲亦可堪胸次饒春溫閒中富貴誰能有白玉黃

金合成酒屏除童僕不入門行酒却驅坐上賓公榮不
飲亦殊苦罰作怪禽筵上舞牆陰一尺掃不開醉便埋
此何須回一層銀燭輝一層新月影樹頭屋角看更奇
倒射清光百餘頃主人不送客亦行脫畧酒後皆呼名
來時衣上黃去時衣上碧來乘斜陽去月色君不見人
奇馬亦清到骨嚼我海棠枝上雪

附同作

張問陶

臘月初三雪後拉容堂就穉存飲酒醉後酣卧雪中
不知何以遂至松筠禪院五更酒醒見案上有朱習
之方茶山名刺僅云此二公者昨日戌時過訪坐此
室中談笑久之乃去主人不知也因細詢昨日事僅

云主人在雪裏時但聞洪顓二公呼李太白主人在
床上時但聞朱方二公叫劉伯倫而已

賓主威儀一笑空酒杯嵌入雪當中大家伏地同牛
飲直有無裊已上風

錦衣玉帶雪中眠醉後詩覓欲上天十二萬年無此
樂大呼前輩李青蓮

何人負我入輕車混把空門當敝廬寄語鄰僧須看
樣非仙非佛是真如

上帝敲門也不開偶然醉死亂書堆比鄰二妙真多
事悄入遊仙夢裏來

張同年將乞假歸蜀醉後作兩生行送之

一生居坊南一生住坊北車聲馬聲不得停十里路中
常若織我馬見君馬鳴聲一何高君僮與我僮望著手
卽招我來時多子來少馬繫寺門僮醉倒青天如磨旋
不休醉裏有時來打頭心癡直欲走天外下瞰日月方
開眸朝沽三升算盈斗吸盡東西兩坊酒朝衣典盡百
不憂尙有身上青羔裘一生皇然開笑口那著酒錢街
上走一生無聊想更奇酒盡伏舐壚邊泥有時忽下牀
有時忽出門人來雪裏衣盡白疑是送酒柴桑人幕天
席地原無礙十萬人中兩人醉醉中分手亦不辭淚墮
黃公酒壚內君不見長安莫復輕酒人酒人腹裏饒經
綸容卿百輩等閑事爛醉尙復噓陽春一篇我作臨行

曲馬帶離聲。僮欲哭。從此長安少。一生酒星只照南頭屋。

附同作

張問陶

讀君兩生行。涕笑一時作。黑夜關門讀不休。打窗奇鬼爭來攪。懷詩急走心茫然。遠登雲棧如登天。人言彼土卽吾土。藏詩可以經千年。我方欲西行。一星墮我前。戴鐔衣。寶佩龍勺俗客驚。駭疑真仙莫驚鬼。奪詩我爲公呵護。且復立斯須。和此好詩去。是時下界冬已殘。風狂雪虐天漫漫。一生牽衣愁欲絕。一生和詩嘔出血。城南萬柳禿無枝。天詔酒星綰離別。重讀兩生行。如見兩生情。一一若吾語。大痛難爲康。翩然

一躍入杯底繞地萬人呼不起生瑜生亮偏同時萬
古之名今已矣酒星抱月來擲入兩生杯兩生驚起
糟邱臺歡呼轟作隆冬雷忽聞門外征馬語兩童泣
下紛如雨馬聲高朗童聲俯似訴兩生離別苦一生
聞之悲一生聞之喜兩生悲喜人不知天外浮雲地
中水君不見開天盤古氏其情最可憐九州莽莽無
人烟獨坐獨行一萬年又不見高真之居亦孤寂舉
酒招人人不暱九天費盡百神謀僅奪唐朝一長吉
兩生把盞同軒眉居然日日相追隨一生偶送一生
去臨期何必吞聲悲我馬莫憐君馬獨君僮莫向我
童哭雲天萬里好聯吟共把長空當詩屋

再送張同年一律

更從何處別且復上高樓一世真遊戲三旬偶滯留已
超生死却難破古今愁何日青天外同君一舉頭

附同作

張問陶

吸盡都城酒萬杯此行原不算空回眼前醉語天取
去別後詩情夢補來小住談心孤月滿狂呼拍馬亂
山開思君他日書千紙定向峨眉頂上裁

小除日仿唐賈島例與張同年問陶祭一歲所作詩並
屬王文學澤爲作圖各係以詩

君詩四百篇我詩六十首君詩苦多我苦少差喜流傳
同不朽我年二十登詞場接詠已有橋西黃仲則晏公

祠內祭詩處一屋神鬼皆憎狂生年三十尤奇肆是日
孫郎號同志筆壓南山白額愁挺鋒復把生龍試燕秦
楚趙遊何壯所不能臻祇天上風月千場酒萬場醉中
歲月偏奔放爾來四十氣已降筆陣敢詡今無雙异才
爾復出西蜀百斛龍鼎邀同扛前年同客龜山左我不
知君子知我直待蓬山頂上行相知一世方能果我詩
與君詩識者不能別雖然我自知與爾陳一一長江一
萬里先瀉君門前若論飲水源我較輸君先一年三百
日日日有昏曉若量日出時我比君家早君如吸盡江
水源使我門外朝夕無奔湍我如繫住西馳日令爾屋
頭終古長如漆我放白日西爾蹴江水東高高下下總

無極與爾分半填心曾爾筆何處架青城與蛾眉我硯
何所支黃山與天台天公夜半笑口開餘子位置蒸雞
哉此時一瓣香爇入九霄碧惹得千家與萬家如椽紅
燭都無色君不見黃郎黃郎已前死不及見君詩百紙
孫郎雖狂一字無見爾亦作奇人呼今宵約不來苦說
有官事坊西令我走不休欲拉閑人作陪祭醉中一客
爲作圖更遣一客題分書時軾適至君不見門前車轍
痛掃除分付鬱壘同神荼今夜俗客不許來催租

送張同年問陶乞假歸蜀并序

乾隆五十六年歲在辛亥二月朔日同歲生張君問
陶乞假歸蜀其友洪亮吉采玉田之蔬挈山陰之尊

送之于國西門曰足下家居遂寧婦留成都鼻子遠
宦已傷親心曩臣贅秦復悲身計然則足下辭金門
而南邁並赤日以西馳勞乎此行蓋非能已仍復迂
道宿洛戒途雍梁爰謀裹糧並訪親舊西嶽道士留
之而不能東方細君隨之而共反百武之外弱弟出
迎一門之中密親咸萃解笏金而貯案被采服以娛
親雖嚴生告歸相如乘傳不是過也又足下宰相四
世孫也葛侯冢畔八百之株尙存召公祠旁一隅之
宅能割谿茶可采則病婦攜筐山筍欲抽則衰年補
徑秋原半頃稅給于王官春韭一畦食供于家老而
且煮米作糲春麥爲羹以資餘人或給耕者甫生之

犢等愛于孩提頻來之燕視同于親故則亦物我均
適心形兩忘者焉又況蠶經禽演不乏奇書蛤港羸
田別開精舍臘頭宴客社尾迎神朝衫忽著則鄰里
詫觀縣令偶來則牛羊驚竄南軒旣闢北牖時開果
落枕前花開鏡裏一林百樹招鵲辭雅雙澗疊波留
魴放鱧若是者采其吉語娛我眉梨懲彼殺機戒茲
子弟播三田之種閣上巡觀廢七月之章房中屬和
未嘗不集吉門之慶極幽居之致焉定省之暇時而
出遊則裁眉當其前青城出其後大江流其左資水
徑其西解角之鹿可施鞍橋浮鼻之牛以當丹楫餐
雲欲曙之嶺采藥斜陽之洲團蕉數尺非佞佛而可

跌危梯百層不學仙而亦往閑防疾厄時覽方書偶
有篇題緘之經藏此則金門大隱不止平原玉筍真
人復來宏景若夫僕與足下之交道又可言焉僕處
鵠音之里君居吠日之方蛰距之合無由牛馬之風
不及乃闕前一覲忽若素知飲中百篇愛同前哲顧
性嗤釋氏敢侈前因亦鄙道流詎云緣法靜言思之
迫卽吾儒之所謂如舊相識乎夫卅年成世足下旣
近之僕則又過半矣俯仰一身離合萬里常恐百年
交道不盡然精氣不散當成神明風車電帷來往不
絕則僕與足下又何慮哉又何慮哉自此之別一日
之內僕眺朝陽君眺夕采一江之流君飲水源我飲

波末則亦何嘗有須臾之間遠近之殊哉保齋神理
時時讀書簡牘不詳悉之于夢亮吉頓首頓首

城南初日照高樓樓下勞勞僕馬愁此日別君須握手
古人見爾尙低頭交同北郭推三世學許東方記十洲
竟欲上天留不住夢魂隨過古安州

附留別詩

張問陶

離筵相對別情多曾與羣仙會大羅半世心交偏得
爾十年詞筆偶登科堅持壁壘爭詩律亂擲尊罍閱
酒魔忽送孤鴻天際去月明千里意如何

年年奔走逐風塵又對春明折柳人蠹篋隨身千管
禿鶉衣衝雪一童貧山中酒熟還家好雲外心閒得

句真肯學長卿西去日高車駟馬嚇鄉鄰

一椽破屋寄三川累我西行欲上天十萬峯巒生足
下尋常雲月在眉前花時泥飲從田父雪夜狂歌理
釣船只恐重來忘禮數倒持手版謁同年

小礪輕車出鳳城東風煖到子規聲一官偶得常疑
夢萬里能歸豈好名細詠白華真樂事便言晝錦亦
人情迴鞭忽下憐才淚八百孤寒羨此行

袁大令枚病中以自挽詩索和率賦一篇寄呈

我生爲鮮民逮養苦未果孤真同孟陋名合作楊軻雖
然檢此身欲死尙不可唯公丈人行早結文字緣事勲
與文章一一喜可傳卽論委蛻期事亦須推袁幸公未

死時我欲代公述二十厲志初七十著書畢若論文福
兼公可死者一早年預清班繼復作循吏風謠至今留
俎豆倘可異若論位望亨公可死者二君卿取十妻諸
葛得二男身如柏枝強境若蔗尾甘若論居處優公可
死者三十洲縱未遵五嶽已畢至黃山武夷間垂老游
復肆若論山水緣公可死者四拾遺陪耒陽供奉隕江
潯昌黎不攝生和仲備疾苦若論年命豐公可死者五
中書廿四考方鎮四十年汾陽處危疑長沙疾縣延身
命匪不達得不償失焉何如公致身半世卧巖谷入門
與出門偃仰無不足若論心志舒可死不止六世凡號
爲儒家置公一編上者師公文次學公詩篇下逮決科

策誦之口流涎公名聾瞽知公貌僮媼識或疑天上人
或引作前哲甯知公尙在年僅七十七如此復不死寧
能望神仙勢必神采離形作塊壘牽與其卧閨闈曷若
墟塚間顏公自爲銘陶令自作詩頗怪同輩中一一不
和之逮公始創例徧索執紼詞我謂果愛公生并致脯
奠及公能飲食一切口嘗徧庖人出新意尙可令公羨
又公在地上說鬼不肯休恐歸地下時萬鬼聲啾啾蓄
憾旣已深瓦礫伺間投公其見夢余聊可助一臂公雖
塊然亡我尙有生氣鬼車與鬼馬辟易一萬騎公今雖
自挽我更欲速公公如讀之竟大笑聲隆隆當嘉此狂
生交道有始終

袁大令以辛亥除日復作告存詩七首索和戲加二絕
奉答

赴書昨日過江東消息傳來總不同我信戴逵無死法

越中名士勝吳中

時誤傳錢少宗伯載赴書至京

儻來勲業那堪論絲竹東山道自尊却見白鷄原不碍
故應久占謝公墩

已抵紅塵一百齡名山五十載韜形如何更展人間限
天上多應妒歲星

告存纔接七篇詩此語賓朋喜可知誰識仙山樓閣裏
有人望眼欲穿時

準擬銘旌已欲題無端白日忽回西生天成佛都應後

莫晒精廬孟會稽

耆舊居然壓輩羣老來心力著書勤十分彭祖當時壽
却愧公還未一分

人嫌不及此偏過恐是神仙受折磨謫籍至今填未滿
周妻何肉累公多

名山咫尺好攀躋趁此春江綠欲迷畢竟太真年命脆
請公來日試然犀

脫手新詩衆競鈔豐干莫怪舌偏饒兩篇多作非無意
先代巫咸賦九招

里中十二月詞

辛亥小除夕避債沙河門側因憶里中舊遊及諸勝

事爰成十二月詞十二首

西瀛里畔人聲沸翠色染天紅蓋地排門剝粉書豐年
屋後水扉燈影連橋上人橋下艇不斷櫓聲兼帽影東
迎邗水西接城夾河祇聞爆竹聲料量香燭南街口共
向喜神方上走元宵節近當出遊却喜客歲晴中秋綰
西瀛里中爲百貨叢集之所臨河一帶半皆染坊屋上
飛竿插天大率皆繫布廊也除夕爆竹聲尤盛諺朝紅
綠紙積地常至寸許又里婦以此爲驗十常不失一
歲中秋積地則元夕月又里婦以此爲驗十常不失一

右正月

神祠昨日鐙花笑屈指社公生日到龍鐙九節菱滿池
就近還叅各神廟後街絲管聲沸天鐙影直接斜橋邊
衣香隊裏春雲熱謁廟仍須夜深出鐙光疎處穿市過

社公不拜拜社婆延回只說歸塗枉朱雀橋邊水聲響
笑指鄰家姊妹言百花生日還相訪里中近年尤重社
宵更盛城內外社公祠數十區惟北後街及斜橋二處
最修整至期絲竹聲每徹夜不絕傾城士女皆于更定
後出遊朱雀橋在玉梅橋
東過橋卽楊氏園亭也

右二月

二月二過三月三薺花黃徧穿單衫單衫何處尋春好
先踏艤舟亭畔草紅梅閣接迎春堂一路草香花亦香
紅牆缺處危樓突正好滿塘春水活賣花擔子不得停
昨日寒食今清明花間古廟門開早一片香烟接花裊
傾城人出不遽歸緩步却從城北回君不見興闌欲訪
閒桃李却惜山莊前已圯里諺云三月三薺菜花兒單
布衫艤舟亭紅梅閣迎春堂

皆在城東距城北三里
有青山莊為前明吳氏別墅
林壑之勝甲于郡中雍正
中張布政遷居之後籍入
官為里中富民所有乾隆
三十一二年其家中落遂
拆以償逋迄今久鞠為茂
草矣

右三月

玫瑰花香一城嬾數起
數眠天不晚城彎北去
覓午涼柳線亂將行客
綰鮪魚上市值萬錢山
筍轉嫩櫻桃鮮微泉閣
枕綏雲閣商畧欲啟茶
藤筵廉纖梅雨纔經夕
已報江波入三尺趙家
樓上望欲驚畫舫却與
樓窗平

出東門至天南寺後有曲巷一條名城彎夏中納涼所也微泉閣在縣學西侍御史董玉此別業今歸趙氏綏雲閣在雲溪東舊屬呂氏今地

右四月

柁工昨日支關鈔迓得龍頭出
神廟龍身沉處奠酒有

頃刻龍尾波心搖六龍城古龍舟七城北東西按方色
一層彩額銓一層水面徑看高百尺晏公祠外臨河許
朔日先聞賽神鼓三元高閣颭錦標聯尾北出迎春橋
飛竿快漿都成隊船上樓中卷簾對打招要取波面寬
一舸前呼百船退雲溪半里樓接天一河銓光人不眠
龍頭纔過看龍尾四面十番絃索起洞庭楊梅甜不酸
更有盧橘堆成盤舵樓吳姬約早餐港口昨到江魚船
每歲競渡時一龍舟列支許聖廟稅銀十餘兩常州城
有六門舊號六龍城余所賦龍舟有大青大小白及
烏龍金龍五色龍凡七午節後篙工取大石沉舟于
河底而以龍頭藏廟中至用時乃迎取焉晏公祠三元
閣皆在雲溪

右五月

萬花開後園林老日永如年客來少銀衫斗笠思出遊
城北水上多危樓窗櫺豁處天光現十頃荷香撲人面
東西兩水夾寺門水綠欲把門扉吞紅闌幾曲生林杪
屋古似巢僧若鳥閒僧喚客客不應小艇出市前溪淩
晚涼莫向閒街走九栢山房門新酒城北放生巷內外有池寬至十數頃
荷花甚盛菴南卽元處士謝應芳祠後有樓甚涼敞又西行數十步卽楊進士倫九栢山房也

右六月

七月七日侵曉妝牛郎廟中燒股香回塗更把裙衫整
織女橋邊鑒春影彎彎新月看至圓結伴好上臨河船
東塘北岸人爭覩倚艇低頭放鐙去今年鐙樣人更誇
飄出萬朶紅荷花年年歲歲祈無疾自信今宵鬼緣結

君不見東家女兒結束工染得指甲如花紅斜簪茉莉
作旛勝鬢影過處饒香風又不見西家女兒還未嫁閉
戶挑鐙坐深夜神鐙社火總不看獨望銀河占米價此
外十里有牛郎廟旁一木橋俗名爲織女橋中元日土
俗普放河鐙又多市指幣于深夜燒之名結鬼絲七夕
前後天河隱不見者常十數日吳俗
以日數之多寡驗米價貴賤多不爽

右七月

十三月如元宵十四十五光尤饒蒹葭莊來鶴莊更有
蘆墅蒨堪嘗歸來樓上開扉望正見光從海門上江波
濯月月更涼千戶萬戶堆新霜層樓影向三更直高下
稜稜瓦檐濕更殘女伴出走橋行過八字剛三條顏顏
難却鄰姬請更走烏衣及紅杏莊家燈謎猜不完曲巷

更有花鐙看打十番跳百索攔路復看飛鼠落堦鞋繞
了復墮釵南街怯行行北街君不見團團明月方迎面

一入采棚天不見

蕨葭來鶴二莊桂花最盛蘆墅在北門外產菱尤佳八字橋在城東與紅

橋及元豐橋斜對烏衣紅杏二橋名在邪溪上近年中秋鐙誕盛行已酉庚戌莊公子達吉在里門延名士十數人專司其事以是所製尤膾炙人口中秋前二日恭值萬壽聖節居民皆結采爲棚張鐙至五晝夜大

街及西瀛里尤盛

右八月

中秋說餅辰重九題糕節汪三湯餅倪婆糕却與龔九
作三絕出門衣袂多北風偏向南郭聽齋鐘再轉僻寺
來城東驚聞天半人聲雜一郡人登七層塔攔門一客
索一錢鼓勢直上浮屠巔窗櫺八扇迷方向咳吐皆飛

鳥巢上前行如挽後若推足底復有人頭來飛梯盡處
波如鏡坐久蒲團始神定閒尋菊種來僧房更借苦茗
澆詩腸歸途忽見紅鐙簇禮斗筵前夜焚錄雲溪說夢
繫粉舊仙
橋江三製餅皆舊有名近厨人龔玉魁製粉丸亦精清
涼寺在南郭外九月中香會頗盛自城南至東郭必出
崇慶寺前太平寺在東郭有塔七層爲九日登高處里
中人常以九月禮斗城東毘耶室塔隱山房皆禮斗壇

右九月

一花一草都無色黃葉砌邊堆數尺下元會好強出遊
乍冷客亦披輕裘蕭辰欲借笙歌暖排得雲車大街滿
迎神曲好還送神香篆影裏回陽春馬山紫蟹螯鸛鵲蕩
青魚尾屈指消寒會當起舍南竹屋梅乍開掃室便已
安尊罍趙君飽噉吳君飲更有蔣君工食品潁州酒政

推嚴明不到四更杯不停君不見坐中有客歸何遽欲
附租船上墳去里中賽神以清明中元下元三節屆期
皆詣北堰行禮出入儀仗甚盛
兼設雲車臺閣故事頃城十女咸設幕觀焉蠶產太湖
者作鵲蕩在西門外五里產魚最多里中諸老輩趙丈
繩男食量兼人吳上舍祖健稱豪飲蔣太守熊昌酒攻
九巖舍南竹屋則余侍御舅氏書舍也食品每出新意
他人做之皆不及又吾
鄉展墓以清明及上月

右十月

租船歸日盈筐載精穀上倉粗入碓嚴寒料理及齋鹽
買得城南幾挑菜花豬成隊羊一羣冬至日前商祀神
蜡筵開處賓朋滿紅燭壓簾行酒緩清歌小部方上場
門外嫁女笙簫忙君不見東鄰贅壻仍開讌白說豐年
百般便連天爆竹西半城一月不停歌吹聲樂工醺醺

自來飽却謂今年日辰好吳俗于冬日預蓄菜數百斤以鹽漬之可經久不壞里中
富人于冬至後報賽召曰增筵是日必漏請親朋又生俗婚嫁事必擇冬季若遇豐歲則更多亦昔人羅障逆女永判而止之遺意也

右十一月

桃仁滿把餠盈掬臘八家家煮膏粥袈裟三百紅滿街
穿徧一城云化齋闍于影裏飛花爆相約廿三先祀竈
神祇五路土五方屋後有井堂前倉小兒新年上學堂
牲醴并欲祠文昌年殘百物先儲蓄家譙賓筵喜俱足
君不見書生生計絕可憐研斷凍墨書春聯臘月八日
游并饋親鄰或東天甯寺僧徒常三百餘人臘月初則空寺盡出各化臘八米祀竈舊以廿四日今則家計稍裕者皆移廿三土俗以五路神爲行人歲盡則祀五方土土人則加祀文昌朱衣歲除寒士之最窘者恒設筆

硯于通衢代賜春
聯可日得數百錢

右十二月

曾孫用勲校刊